

*Proyecto Piloto TNO
Caribbean*

Pasonan pa spaar coriente na Biblioteca Nacional Aruba

ORANJESTAD – Biblioteca Nacional Aruba ta tumando pasonan actualmente pa reduci su consumo di coriente, cu sosten di TNO Caribbean.

E instituto estableci na Aruba ta dirigiendo un proyecto piloto na BNA, unda ta enfoca riba factornan relativamente simpel pa ehecuta. Por ehempel optimalisa e maneho di clima pa medio di miho mantencion, hisa temperatura cu algun grado y instalacion di timer pa asina percura cu e airco ta paga den oranan di anochi, ora cu no ta uza e espacio. Ademas hunto cu e pasonan aki, den ultimo lunanan a cambia tur e iluminacion, tanto paden como pafo, pa lampinan LED, den cuadro di e proyecto Philips. E trayecto completo ta monitor pa aparatonan special di TNO Caribbean, di forma cu por midi e reduccion di consumo detayadamente.

E proyecto piloto di BNA ta sigui despues di un analisis haci pa TNO na 2015 riba e potencial di spaarmento di energia den edificionan publico. A traha e rapport riba peticion di Pais Aruba y a selecta 25 edificio publico, di 155 en total cu tabata gasta mas coriente. Despues a ehecuta un audicion energetico riba e 25 edificionan aki. BNA tabata un di nan, Den e rapport a conclui cu si haci un inversion di un solo biaha di mas o menos 550 mil florin na tur e edificionan aki, combina lo produci un reduccion substancial di gasto di coriente. Lo por logra esaki door di ehecuta algun medida relativamente simpel, manera regula luznan, percura pa mantencion apropia di e sistemanan di airco, regula temperatura y instalacion di timers.

Segun TNO Caribbean, Pais Aruba, cu BNA como proyecto piloto ta na bon caminda pa tuma e prome paso na un portofolio di edificionan cu ta energeticamente eficiente. BNA riba su mes ta bira un ehempel pa otro edificionan publico. No solamente sector publico por probecha di e pasonan aki. Sector priva tambe por siña hopi di e proyecto aki y haya stimulo pa tuma accion comparabel pa asina por baha gasto di consumo di coriente.